

四庫全書

史部

欽定四庫全書

史部
寶刻叢編卷二

詳校官編修_臣潘庭筠

編修_臣程嘉謨覆勘

總校官編修_臣王燕緒

校對官編修_臣吳錫麒

謄錄監生_臣陳韶

欽定四庫全書

史部十四

寶刻叢編

目錄類二 金石之屬

提要

臣等謹案寶刻叢編二十卷宋陳思撰思臨

安人所著小字錄前有結銜稱成忠郎緝熙

殿國史實錄院秘書省蒐訪又有海崇譜自

序題開慶元年則理宗時人也是書蒐錄古

碑以元豐九域志京府州縣為綱其石刻地

里之可考者按各路編纂未詳所在者附于
卷末兼採諸家辨証審定之語具著于下今
以元豐九域志及宋史地理志互相參核其
中改併地名往往未能盡一即卷內所載與
目錄所題亦不盡相合如目稱鎮江而卷內
稱潤州目稱建康而卷內稱昇州之類不一
而足蓋諸家著錄多據古碑之舊額思所編
次又皆仍諸家之舊文故有是訛異至于所

引諸說不稱某書某集但稱其字如蔡君謨
王厚之之類又有但稱其別號如碧岫野人
養浩書室之類茫不知為何人者尤宋元坊
肆之陋習然當南北隔絕之日不得如歐趙
諸家多見拓本而能紬繹前聞博考方志于
徵文攷獻之中寓補葺圖經之意其用力良
勤且宋時因志地而兼志碑刻者莫詳于王
象之輿地碑目而河淮以北概屬闕如惟是

書於諸道郡邑綱分目析沿革釐然較象之
特為賅備朱彝尊嘗欲取所引隸續諸條以
補原書二十一卷之闕今考所引如曾南豐
集古錄施氏大觀帖總釋序集古後錄諸道
石刻錄復齋碑錄京兆金石錄訪碑錄元豐
碑目資古紹志錄諸種今皆散佚不傳猶藉
是以見崖畧又汝帖十二卷慈恩鴈塔唐人
題名十卷以及越州石氏帖目則他書所不

載而亦藉是書以覘其大凡亦可云有資考
証者矣鈔本流傳第四卷京東北路第九卷
京兆府下十一卷廉鳳路河東路十二卷淮
南東路西路十六卷荆湖南路北路十七卷
成都路並已闕佚十五卷江南東路饒州以
下至江南西路亦佚其半十八卷梓州利州
路惟有渠巴文三州而錯入京東西路淮南
諸碑其餘亦多錯簡如魏三體石經遺字條

下文義未竟忽接石藏高紳家紳死其子弟
以石質錢云云乃是王羲之書樂毅論跋語
傳寫者竄置于是朱彝尊經義考于刊石門
內魏石經條下引歐陽棐趙明誠藏高紳家
云云蓋未詳究原書故沿其誤今一一釐正
其闕卷則無考補姑仍其舊焉乾隆四十六
年十一月恭校上

總纂官

臣

紀昀

臣

陸錫熊

臣

孫士毅

臣

孫士毅

總校官臣陸費墀

欽定四庫全書

提要

欽定四庫全書

寶刻叢編卷一

宋陳思撰

京畿

東京

開封府春秋時為衛陳鄭三國之境戰國時
屬魏秦屬三川郡漢屬陳留河南潁川淮陽
郡東漢改淮陽為國陳晉屬陳留滎陽潁川
元魏屬陳留許昌東魏分置開封郡兼立梁
州北齊罷開封郡周改梁州為汴州隋開皇
初罷陳留大業初罷汴川分入滎陽等郡唐

武德四年復立汴州梁以周建國陞為東京
開封府後唐復為汴州宣武軍晉復陞為東
京開封府漢周及皇朝因之今縣十四開

封祥符尉氏陳留雍丘封丘

中年陽武酸棗長垣
東明扶溝鄆陵咸平

石鼓文

互見鳳翔

舊在岐陽孔子廟世傳周宣王刻石史籀書大觀中

自鳳翔遷入辟雍後入保和殿

諸道石刻錄

石鼓文初不見稱於前世至唐人始盛稱之而韋應
物以為文王之鼓至宣王刻詩爾韓退之直以為宣

王之鼓在今鳳翔孔子廟中鼓有十先時散棄于野
鄭餘慶置于廟而亡其一皇祐四年向傳師求于民
間得之十鼓乃足其文可見者四百六十五摩滅不
可識者過半余所集錄文之古者莫先於此然其可
疑者三四今世所有漢桓靈時碑往往尚在其距今
未及千歲大書深刻而摩滅者十猶八九此鼓按太
史公年表自宣王共和元年至今嘉祐八年實千有
九百一十四年鼓文細而刻淺理豈得存其可疑者

一也其字古而有法其言與雅頌同文而詩書所傳之外三代文章真跡在者惟此而已然自漢以來博古好奇之士皆畧而不道此其可疑者二也隋氏藏書最多其志所錄秦始皇刻石婆羅門外國書皆有而獨無石鼓遺近錄遠不宜如此此其可疑者三也前世傳記所載古遠奇怪之事類多虛誕而難信況傳記不載不知韋韓二君何據而知為文宣之鼓也隋唐古今書籍粗備豈當時猶有所見而今不見之

耶然退之好古不妄者余姑取以為信爾至于字畫亦非史籀不能作也

集古錄

歐陽文忠公以為今世所有漢桓靈時碑往往而在距今未及千載大書深刻而摩滅者十猶八九此鼓自宣王時至今實千有九百餘年鼓文細而刻淺理豈得存以此為可疑余觀秦以前碑刻如此鼓及詛楚文泰山秦篆皆麓石如今世以為碓臼者石性既堅頑難壞又不堪他用故能存至今漢以後碑碣石

雖精好然亦易剥缺又往往為人取作柱礎之類蓋古人用意深遠事事有理類如此況此文字畫奇古決非周以後所能到文忠公亦以謂非史籀不能作

此論是也

金石錄

歐公集古所錄其文可見者四百六十有三磨滅不可識者過半今資古所錄其文可見者四百七十有四磨滅不可識者十二三蓋余先世所藏本猶在集古之前也

國朝崇寧中蔡京作辟雍取十鼓置講堂後余嘗見之辟雍廢徙置禁中而歧下有摹本殊失古意併錄之以見三代書蹤非後世摹寫所能及也

資古紹志錄

石鼓十篇大抵為漁狩而作甲言漁乙丙丁戊己庚辛壬癸言狩乙癸言除道皆言為田狩而除道戊言策命諸臣已言享社而皆有事于田狩也辛言漁狩而歸也十篇而次以十日者後人之次也石鼓不見稱於前代至唐始出於岐陽先時散棄於野鄭餘慶

取置於鳳翔之夫子廟堂而亡其一皇祐四年向傳
師求於民間而得之十鼓於是乎足信知神異之物
終自合耳大觀中致之辟廱後復取入保和殿經靖
康之變未知其遷徙否世言石鼓者周宣王之所作
蓋本韓退之之歌也韋應物以為文王之鼓至宣王
刻詩不知二公之言何所據見然前代皆患其文難
讀樵今所得除漫滅之外字字可曉但其文不備故
有得而成辭者有不得而成辭者焉然篆書之始大

緊有三皇頡之後始用古文史籀之後始用大篆秦
人之後始用小篆樵自續汗簡攷古尚書纂分音之
韻作象類之書其於古今文字粗識變更觀此十篇
皆是秦篆秦篆者小篆也簡近而易曉其間有可疑
者若以也為毆以丞為丞之類是也及攷之銘器毆
見於秦斤丞見於秦權正如作越語者豈不知其人
生於越作秦篆者豈不知其人生於秦乎秦篆本于
籀籀本於古文石鼓之書間用古文者以篆書之所

本也秦人雖創小篆實因古文籀書加減之取成類耳其不得而加減者用舊文也或曰石鼓固秦文也知為何代文乎曰秦自惠文稱王始皇稱帝今其文有曰嗣王有曰天子天子可謂帝亦可謂王故知此則惠文之後始皇之前所作也或曰文則爾也石鼓何義乎曰古人制器猶作字也必有所取象若尊若彝若爵之類是也皆是作鳥獸形而自其口注其受大者則取諸畜獸其受小者則取諸禽鳥先儒不達

理於尊彝則妄造不適用之器而畫以鳥獸形爵雖
象爵而又不適用宣和間所得地中之器為多故倣
古而鑄祭器因以賜大臣其制作不類於常祀之器
應知先儒之說多虛文也近陸氏所作禮象庶幾於
古乎其於禮圖固有間矣歟識之用則亦如是而取
諸器物商人之識多以盤周人之識多以鼎盤鼎雖
適用之器然為銘識之盤鼎不必適於用也但象其
器之形耳石鼓之作殆此類也嗚呼鼎鬲遠矣世變

風移石鼓者其立碑之漸與然觀今中原人所得地中之物多是盤鼎鐘鬲南粵人所得地中之物多是銅鼓其間有有文字者有無文字者然皆作鼓形此由其風俗之所用也南粵多銅錫故其鼓以銅岐周多美石故其鼓以石此又由其土之所出也或言楚蜀之地中間亦有得銅鼓者南粵與楚蜀北連岐雍豈其所習尚者多同與

鄭樵石鼓音序

石鼓文周宣王之獵碣也唐自貞觀以來蘇勗李嗣

真張懷瓘竇泉竇蒙徐浩咸以為史籀筆蹟虞世南
歐陽詢褚遂良皆有墨妙之稱杜甫八分小篆歌叙
歷代書亦廁之倉頡李斯之間其後韋應物韓愈稱
述尤為稱至本朝歐陽脩作集古錄始設三疑以韋
韓之說為無所考據後人因其疑而增廣之南渡之
後有鄭樵者作釋音且為之序乃摘丞殿二字以為
見於秦斤秦權而指以為秦鼓偽劉詞臣馬定國以
宇文泰嘗蒐岐陽而指以為後周物嗚呼二子固不

足為石鼓重輕然近人稍有感其說者故予不得不辨集古之一疑曰漢桓靈碑大書深刻磨滅十八九自宣王至今為尤遠鼓文細而刻淺理豈得存予謂碑刻之存亡係石質之美惡纂拓之多寡水火風雨之及與不及不可以年紀久近論也且如詛楚文刻於秦惠文王時去宣王為未遠而文細刻淺過於石鼓遠甚由始出於近歲戕害所不及至無一字磨滅者顏真卿干祿字刻於大歷九年顯暴於世工人以

為衣食業摹拓為多至開成四年纔六十六載而遽已訛闕由是言之年紀久近不足推其存亡無可疑者二疑以為自漢以來博古之士畧而不道三疑以謂隋世藏書最多獨無此刻予謂金石遺文濶於瓦礫歷代湮沒而後世始顯者為多三代彝器或得於近歲其制度精妙有馬融鄭玄所不知者又詛楚文筆蹟高妙世人無復異論而歷秦漢以來數千百年湮沉泉壤近歲始出於人間不可謂不稱於前人不

錄於隋氏而指為近世偽物也予意此鼓之刻雖載於傳記而經歷亂離散落草莽至唐之初文物稍盛好事者始加採錄乃復顯於世及觀蘇勗叙記尤喜余言之為得也則夫隋世之不錄又無足疑者况唐之文籍視今為甚備而學者不敢為臆說自貞觀以來諸公之說若出一人固不特起於韋韓也而韋應物又以為文王時鼓宣王刻詩言之如是之詳當時無一人非之傳記必有可考者矣小篆之作本於大

篆丞殿二字見於秦器固無害況丞字從山取山高
奉丞之義著在說文字體宜然非始於秦也唐初去
宇文周為甚近事語尚在於長老耳使文帝鐫功勒
成以告萬世豈細事哉宜時人共知之況蘇勗之祖
邳公綽用事於周文物號令悉出其手豈得其賢子
孫乃不知其祖之所作者乎嗚呼三代石刻存於世
者壇山吉日癸巳刻與此耳而吉日癸巳無所考據
獨此鼓昔人稱說如是之詳觀其字畫奇古足以追

想三代遺風而學者因可以知篆隸之所自出好異者又附會異說而詆訾之亦已甚矣其鼓有十因其石之自然粗有鼓形字刻於其旁石質堅頑類今人為碓礮者其初散在陳倉野中韓吏部為博士時請於祭酒欲以數橐駝輿致太學不從鄭餘慶始遷之鳳翔孔子廟經五代之亂又復散失本朝司馬池知鳳翔復輦至府學之門廡下而亡其一皇祐四年向傳師搜訪而足之大觀中歸於京師詔以金填其文

以示貴重且絕模拓之患初致之辟廱後移入保和殿靖康之末保和珍異北去或傳濟河遇大風重不可致者皆棄之中流今其存亡特未可知則拓本留於世者宜與法書並藏詎可輕議也哉紹興己卯歲予得此本於上庠喜而不寐手自裝治成帙因取薛尚功鄭樵二音參校同異并考數字書而是正之書於帙之後其不知者姑兩存之以俟博洽君子而質

焉

復齋
碑錄

自周至戰國遺文見於金石者不過三數祜陵悉萃之保和寶護甚至用金填鼓文以絕模拓一旦干戈擾攘四海橫流泯焉無復遺蹤良可哀歎

施宿石鼓音跋

秦祀巫咸文

互見鳳翔

舊在鳳翔府解今歸御府秦以前遺蹟見於今者絕少此文出於近世而刻畫完好文詞字札奇古可喜

金石錄

秦篆俗謂之詛楚文蓋楚兵來代而禱神之詞也首

稱穆公與楚成王有盟好而楚王熊相倍十八世之約以世家推之楚自成王十八世而至頃襄王秦自穆公十八世而至惠文王惠文王末年與楚數相攻伐疑當時之所作也

集古錄目

秦記巫咸文俗謂之詛楚文總二百二十六字滅及漫不可辨者三十四字以大沈久湫文相參其滅完

字適相補而以古文考之可盡讀云

葉石林

秦玉璽文

元符中咸陽所獲傳國璽也初至京師執政以示故將作監李誠誠手自摹印之凡二本以其一見遺焉

金石錄

東方先生畫贊

晉夏侯湛撰永和十二年書與王敬仁世以為王右軍書碑石舊在丁文簡家今在將作監官庫

諸道石刻錄

智永真草千文

陳浮屠智永書字為真草相間末有唐虞世南小楷

七十八字石在夏守齋太尉家

諸道石刻錄

世傳為浮屠智永書考其字畫時有筆法不類者雜於其間疑其石有亡缺後人妄補足之雖識者覽之可以自擇然終汨其真遂去其偽者二百六十五字不以文不足為嫌也蔡君謨今世知書者猶云未能盡去也梁書言武帝得王羲之所書千字命周興嗣以韻次之今官法帖有漢章帝所書百餘字其言有海鹹河淡之類蓋前世學書者多為此語不獨始於

羲之也

智永千文後七十八字虞世南所書言不成文乃信筆偶然耳其字畫精妙平生所書碑刻多矣皆莫及也豈矜持與不用意更有優劣耶

集古錄

世傳智永書非也蓋智永陳時人而此書虎字民字基字皆闕之以避唐諱乃明皇以後人所書不然筆法本出智永後來臨摹入石爾其間二十八行字畫不類蓋舊本不完國初時人為補足

金石錄

五言帝京篇

唐太宗皇帝御製褚遂良行書貞觀十九年八月

金
石

錄

唐寧堵波幢銘

唐劉仲丘撰薛希昌八分書天寶四載七月立

金
石
錄

唐懷素草書自叙

僧懷素撰并書大歷十二年十月石在將作監

諸
道
石
刻

錄

題禹廟寶林二詩

唐會稽內史徐浩撰并書無年月石在宋宣獻家

諸道

石刻
錄

唐東平王瀛真院記

唐李嶠撰大順元年立在相國寺

訪碑
錄

唐經藏院西天應法禪師碑

諸道石
刻錄

淳化閣帖十卷

太宗皇帝時嘗遣使者天下購募前賢真蹟集以為
法帖十卷鏤板而藏之每有大臣進登二府者則賜
以一本其後不賜或傳板在御書院往時禁中火災
板被焚遂不復賜或云板今在但不賜爾故人間尤
以官法帖為難得

集古
錄

唐太宗購王逸少書使魏徵褚遂良定真偽我太宗
購古今書而使王著辨精猶定為法帖此十卷是也
其間一手偽帖大半甚者以千字文為漢章帝張旭

為王子敬以俗人學智永為逸少如其間以子敬及
真智永為逸少者猶不失為名帖余嘗於檢校太師
李瑋第觀侍中王貽永所收晉帖一卷內武帝王戎
謝安陸雲輩法若篆籀體若飛動著皆委而弗錄獨
取郗愔兩行入十卷中使人慨歎又劉孝孫處見柳
公權所收跋子敬送梨帖然於太宗卷中辨出乃以
逸少一帖連在後而云又一帖不知為逸少也公權
唐名家尚如此顧何議著今長安李氏所收逸少帖

貞觀所收第一帖著名已非逸少真蹟餘可知矣獨

未知徐璈

徐浩子能刻書

所訪者何如耳余抱疾端憂養目

文藝思而得之粗分真偽因跋逐卷末以貽好事同志百年之後必有擊節賞我者余無富貴願獨好古人筆札每滌一硯展一軸不知疾雷之在傍而味可忌嘗思陶弘景願為主書史大是高致一念不除行年四十恐死為蠹書魚入金題玉躋間游而不害元

祐三年維陽倦游閣書

宋元章跋秘閣法帖

淳化中內府既博訪古遺蹟時翰林侍書王著受詔
緒正諸帖著雖號工草隸然初不深書學又昧古今
故秘閣法帖十卷中瑤珉雜糅論次乖僞世多耳觀
遂以莫辨故禮部郎米芾元章筆翰妙薦紳間在淮
南幕府日嘗跋卷尾作數百語頗有條流但概舉其
目踈畧甚多故諸部中或僞蹟著甚而不覺者若李
懷琳所作衛夫人書逸少闊別稍以帖之類有雖審
其僞而譏評未當者若知伯英大令諸草帖為唐人

書而不知乃書晉人帖語之類有譏評雖當主名昭然而不能辨者若以田疇字為非李斯書而不知乃李陽冰明州碑中字之類有誤著其主名者若以晉人章草諸葛亮傳中語遂以為亮書之類是也其餘舛錯尚多書家責能書者備故僕於元章慨然古語有之善書不鑒善鑒不書僕自幼觀古帖至多雖毫墨積習未至而心悟神解時有所得故作法帖刊誤凡論真偽皆有據依使鍾王復生不易此評矣元章

今已物故恨不示之後有高識賞予知言大觀戊子

歲六月七日西都府院東齋序

黃伯思法帖刊誤序

秘閣續帖十卷

元祐五年四月十三日秘書省請以秘閣所藏墨蹟
未經太宗朝摹刻者刊於石有旨從之至建中靖國
元年四月二十三日內出緡錢十五萬趣其工以八
月旦日畢釐為十卷上之

本帖跋尾

崇寧丙戌歲夏調官上都寓城南昭化坊李表伯舍

旅食無事因假信安劉正夫賜本自摹凡十卷用桐
紙六十枚凡再浹月乃竟晴窓潔几寂無塵慮從容
墳郭纖微弗差第此書當時緒次間有乖舛及第十
卷文陋書惡姑因其舊弗刪除去惟此卷逸少諸子
書中乃有弘白一帖

弘白一帖乃王方慶八代祖
見湖州墨妙亭王氏寶章集書

既惡甚語尤淺俗謬廁諸王間殊為不倫故十卷中

止去此一帖耳然第四卷中得四月三日間一帖尚

可刪也

東觀
餘論

大觀法帖十卷

大觀初徽宗視淳化帖板已皴裂而王著一時標題多誤臨摹或失真詔出墨蹟更定彙次訂其筆意仍俾蔡京書簽及卷首刻石太清樓下

施氏大觀帖總釋序

孫過庭書譜

羲之十七帖

大觀二年九月奉聖旨摹勒刊石太清樓下

新増

開封縣

漢邊韶碑

蔡邕書在開封縣東北五里墓前

訪碑錄

漢邊讓碑

在開封縣東北五里墓前

訪碑錄

漢董襲碑

在開封縣東北八里墓側

訪碑錄

尉氏縣

漢西平令楊期碑

在縣西南四十里三亭鄉楊萬村墓南二十步以唐

武德四年自南遷北此

缺

然

寰宇記

唐右庶子于府君碑

姪孺卿撰沙門重潤分書開元十年七月

復齊碑錄

唐萊州刺史于府君碑

撰人姓名缺沙門重潤分書開元十年七月

復齊碑錄

唐靈巖寺碑

唐李邕撰并書天寶元年立

諸道石
刻錄

唐靈州都督李公碑

撰人姓名殘缺杜混元分書李公諱琳碑以天寶三

載析木月立

金石
錄

唐刺史封公德政碑

文字缺落惟餘首尾

訪碑
錄

唐征西大將軍楊僅碑

在三亭鄉路中

訪碑
錄

晉阮籍碑

在縣東四十五里阮臺鄉石馬村墓南二十步文字

缺落惟首尾存

訪碑錄

唐尉氏令李良清德頌

在縣衙公門外天寶五載立

訪碑錄

唐立晉阮籍嘯臺碑

唐獨孤及撰在縣衙東南二十步籍每追遊名賢攜

酌長嘯登此也

寰宇記

陳留縣

漢丞相陳平碑

在縣北二十里文字磨滅其額云漢丞相陳平之碑

訪碑
缺

漢大司農陳羣碑

在縣北二十八里有碑篆文大司農陳羣墓

水經

魏河伯申碑

在縣東北十五里

訪碑
錄

雍丘縣

漢太尉高峻碑

在縣南五十里大善鄉墓下

訪碑錄

漢執金吾高裒碑

在縣南五十里大善鄉墓下

訪碑錄

魏征虜將軍南州刺史王思賢碑

在縣北五十里義陽鄉墓下圖經云思賢名亮

訪碑錄

封丘縣

漢陳留太守程封碑

在縣東二里墓下

訪碑錄

魏隱士程仲碑

程隱君墳在縣西南四里碑在墓下

訪碑錄

程仲字孔禮陳留封丘人
有志行明帝青龍三年徵
不起景初二年正始五年徵
又不就晉武帝泰始二

年卒封元鄉亭侯

懷宇記

魏節婦白氏碑

晉咸寧二年建立白氏程仲妻也二碑同處

訪碑錄

隋寶善寺碑

大業中安鄉司功程式等同修佛像立此碑

訪碑錄

徐州刺史寧遠將軍程超碑

在縣西北十六里墓下

訪碑錄

中年縣

魏太傅鍾繇碑

在尉氏西北三十五里鍾城南三里其地今割屬中

牟碑斷折文字磨滅

訪碑錄

晉潘岳碑

在縣西北七里平秋鄉墓側

訪碑錄

東魏正覺寺重修佛殿記

東魏武定四年建

訪碑錄

北齊正覺寺重修佛殿記

北齊天統三年建

訪碑錄

唐立穎考叔廟碑

唐王利用撰序劉彙銘李琚八分書開元二十九年

歲次辛巳歲

復齋
碑錄

唐浦孝子碑

唐崔稱撰屈突寔八分書孝子名季通與其父良瑗
相繼有至行親喪皆廬墓大歷中宣慰使李季卿以
聞有詔褒美墳壠祥符中

章聖皇帝西祀汾陰過之詔有司封其墓且禁採樵

云碑以大歷三年十月立

金石
錄

唐冲虚真人廟記

唐劉三復撰李德裕八分書太和元年十二月

金錄石

列子觀題名

唐李德裕王起題名

訪碑錄

中年縣壁記

諸道石

刻錄

陽武縣

東魏征虜閭孝侯碑

天平三年立

訪碑錄

唐陽武縣令陶公復故縣記

唐唐衙撰鄭乃中八分書據記縣圯毀二十五年宦吏寓于佛寺貞元己卯歲縣令陶鎰修而復之後令

李倫以貞元十九年立此碑

集古錄目

長垣縣

唐左驍衛大將軍翟仵碑

在縣東南二十五里墓側永徽二年塋

訪碑錄

唐戎州刺史董寶亮碑

唐李儼撰張遂隆分書咸亨四年十月

金石錄

唐長垣令鄭誼清德頌

在本縣衙門內

訪碑錄

酸棗縣

魏酸棗令毋丘悅碑

在酸棗廢縣內按其文名悅字抱僖魏正光三年任

酸棗令民為立碑

訪碑錄

唐建福寺三門頌成碑

唐中書舍人盧藏用按前華州鄭縣尉吳光壁集王
羲之行書建福寺在滑州酸棗縣開元中寺僧增葺
之并建三門初成故曰頌成碑以開元五年正月立

集古
錄目

東明縣

魏徐州刺史韓陵碑

在縣南二十里

訪碑
錄

扶溝縣

漢國三老袁良碑

碑為隸書不著書撰人名氏良字阜卿陳國扶樂人也歷議郎符節令嘗為三老其額曰國三老袁君碑

碑以永建中立

集古錄司

漢故國三老袁君碑篆額在開封之扶溝袁君名良歷郎中謁者將作大匠丞相令廣陵太守議郎符節令國三老梁相以順帝永建六年二月戊辰卒其孫

衛尉滂立此石滂以光和年中為相其作九卿當在
靈帝之初水經云扶溝城北有袁梁碑云陳國扶樂
人事與碑合惟水經誤以良為梁爾

釋隸

唐扶溝令馬公德政頌

唐崔灝撰分書姓名殘缺開元二十九年立馬公名

光淑

金石錄

鄆陵縣

漢故民吳公碑

其額題漢故民吳公之碑碑云熹平元年十二月上
旬吳公仲山少立名迹其他刻畫完好如新文詞頗
拙陋書迹恠而不工然漢時石刻存者漸少而此碑

特完

金石錄

宣和中知鄆陵縣穆延年得之於民間碑無其名仲
山其字也漢之仕者沒有遺愛其州之民為之采石
鑱銘則自稱曰故民吳公匿迹韜光不答聘召作碑
者體其謙晦之操故以民稱之所謂故民者物故之

民也其字畫

缺

筆

釋

唐立漢文範先生陳君碑

在鄆陵廟內裴延休文

訪碑錄

寶刻叢編卷一

欽定四庫全書

寶刻叢編卷二

宋 陳思 撰

京東東路

青州

周為齊國秦置齊郡漢屬北海千乘後屬齊國北海樂安兼置青州晉屬齊國濟南樂安北海隋並廢之大業初復置北海郡唐武德四年曰青州天寶元年曰北海郡陞平盧軍節度皇朝淳化五年改鎮海軍政和元年曰齊郡今縣六 益都 壽光 臨朐 博興

千乘 臨淄

卷二

後魏鄭道昭哀子詩

延昌四年立

金石錄

後魏宣武皇帝御講詩

延昌四年

金石錄

後魏堯廟碑

正光元年八月

金石錄

東魏張烈碑

文字磨滅以事考之蓋張烈也按北史列傳烈為家
誠千餘言臨終勅子姪不聽求贈但勒家誠立碣而
已即此碑是也其卒葬年月殘缺不可辨傳亦不載
惟青州圖經稱卒於元象中云

金石錄

東魏賈思同碑

思同與其兄思伯後魏書皆有傳云青州益都人今
其墓乃在壽光縣而思伯之碑亡矣興和二年五月

立

金石錄

北齊年道志等造寺碑

青州刺史年道志功曹劉徽遠天保元年歲次庚午

六月己未朔二十九日丁亥建

復齊碑錄

北齊臨淮王造像碑

武平四年歲次辛巳六月乙未朔二十七日辛酉建

臨淮王者婁定遠也

復齊碑錄

北齊常將軍廟碑

在臨朐縣

諸道石刻錄

唐雲門山拔龍記

唐北海太守趙居真撰序言天寶玄戰歲下元日居
真拔金龍環壁於此山有瑞雲出洞中有聲云皇帝
壽一萬一千一百歲蓋天寶中玄宗方崇尚道家之
說以祈長年故當時諂諛矯妄之徒皆稱述奇怪以
阿其所好而居真遂刻之金石以重欺來世可謂愚
矣碑字行書天寶中立

金石錄

唐鵲鵲頌

唐明皇撰并行書天寶中立

錄金石

當皇祐至和之間余在廣陵有勅使黃元吉者以唐明皇自書鵲鵲頌本示余把玩久之後二十年獲此石本於國子博士楊褒又三年來守青州始知刻石

在故相沂公宅

集古錄

唐龍興寺長明燈頌

唐邵貞撰王則行書并篆額永泰元年五月

錄金石

唐心經

唐竇鞏書元祐二年十二月

金石錄

唐幡竿頌

唐竇鞏撰并書長慶四年十月立

金石錄

密州

戰國時屬齊秦置聊瑯郡漢屬瑯瑯郡及高
密城陽二國後漢屬瑯瑯郡北海國晉屬城
陽郡元魏屬高密復置膠州隋開皇初郡廢
五年改膠州為密州大業初復為高密郡唐
武德五年曰密州天寶元年曰高密郡皇朝
開寶五年陞安化軍節度今縣五諸城
安丘莒縣
高密膠西

秦瑯琊臺刻石

秦李斯篆書在諸城縣東南百四十里秦始皇二十
八年南登瑯琊大樂之留三月乃徙黔首三萬戶瑯
琊臺下復十二歲作瑯琊臺立石頌秦德臺基三層
層高三丈在瑯琊城東南十里上有始皇碑文字剥

落

寰宇記

秦始皇二十六年初并天下二十八年視巡東方海
上登上瑯琊臺出日樂之忘歸徙黔首三萬家臺下

刻石頌秦德焉二世元年復書其旁今頌詩亡矣其
從臣姓名僅有存者二世詔書具在自始皇帝二十
八年歲在壬午至今熙寧九年丙辰凡千二百九十
五年而蜀人蘇軾來守高密得舊紙本於民間比今
所見猶為完好知其存者磨滅無日矣而廬江文勛
適以事至密勛好古善篆得李斯用筆意乃摹諸石
置之超然臺上夫秦雖無道然所立有絕人者文字
之工世亦莫及皆不可廢後有君子得以覽觀焉

蘇東坡

右秦瑯琊臺刻石在今密州其頌詩亡矣獨從臣姓名及二世詔書尚存然亦殘缺熙寧中蘇翰林守密令盧江文勛模搨刻石從臣五大夫作夫秦山秦

篆亦如此

金石錄

漢安平相孫根碑

碑云府君諱根字元石又云遷鄆長雍奴令換元氏考城令諫議大夫拜議郎遷安平相年七十有一光

和四年十二月乙巳卒

金石錄

漢故安平相孫君之碑隸額君名根嘗為諫大夫議
郎謁者出宰四邑刺荊州相安平以靈帝光和四年
卒此碑體高而勢逸字

缺

碑絕不類惟華

山

缺

漢孫根碑陰

碑陰云中軍督孫玄象孫彥龍大中孫者考舍人孫
延叔等可辨者二百四十四人異姓纔十之一中軍
督似非漢官又有大中十四人不知何官字畫苟且

尚不及魏末諸刻殆類吳晉間下品書札爾似是孫
根後裔多譜其名於上世之碑陰也

復齊碑錄

漢孫嵩碑

孫嵩字賓石碑在安丘縣南四十里墓前

隸宇記

漢王章碑

在安丘縣西南四十里墓前

隸宇記

魏管寧碑

管寧字幼安東莞朱虛人也自黃初至青龍末徵命

十至與服四錫俱不應命碑在安丘縣西十二里墓

前

寰宇記

魏邴原碑

邴原朱虛人也碑在安丘縣北五十里墓前

寰宇記

東魏膠州刺史祖淮碑

天平三年十月立碑云君膠州平昌安丘人也六世

祖逖又云其卒贈膠州刺史按後魏永安中分青州

置膠州刺史隋開皇五年改密州焉

金石錄

隋大業造像碑

在莒縣

諸道石刻錄

唐寶願寺彌陀像碑

無書撰人名氏字為八分書開元十三年正月之吉

作頌在莒

復齊碑錄

唐丈八佛靈迹記

唐龍興寺碑

唐淨土院銘

三碑並諸道石刻錄

齊州

春秋戰國皆屬齊秦屬齊郡二漢屬濟南平原東郡晉屬濟南郡領平壽下密膠東即墨祝阿五縣而以平壽為郡治宋為濟南郡魚置冀州後魏改為濟州隋開皇初郡廢大業初州廢置齊郡唐武德元年曰齊州天寶元年曰臨淄郡五年曰濟南郡皇朝治平二年陞興德軍今縣五歷城禹城章丘長清臨邑

漢趙相劉君碑

碑云君諱衡字元宰濟南東平陵人也又云拜趙相

在位三歲拜議郎年五十有三以中平四年二月戊午卒其四月己酉葬其餘文字完好者尚多衡墓與碑在今歷城縣界中古平陵城傍墓前有石獸制作

甚工云

金石錄

唐徐州都督房彥謙碑

篆額唐李伯藥撰歐陽詢分書碑以貞觀五年辛卯

三月庚申朔越一日辛酉立

復齋碑錄

彥謙玄齡父也在隋任司隸刺史出為涇陽令卒官

不大顯而隋書立傳二千餘字蓋修史時玄齡方為宰相故也在今章丘縣界中世頗罕傳碑陰具載彥謙歸葬恩禮儀物之盛太宗遇玄齡可謂厚矣

金石錄

唐房玄齡神道碑

唐褚遂良書在龍山鎮

訪碑錄

沂州

大周東鎮沂山碑

房晉撰韓景陽八分書長安四年五月立

金石錄

欽定四庫全書

卷二

唐崔仁縱碑

正書無書撰人名氏神龍二年立金石錄

唐脩東鎮沂山記

唐范正則撰并八分書天寶元年二月金石錄

登州

春秋牟子國戰國屬齊秦屬齊郡二漢晉屬東萊郡元魏置東牟郡隋屬東萊郡唐置登州天寶元年曰東牟郡今縣四達萊黃縣年平文登

秦之罘山刻石

秦李斯篆圖經云在年平縣西北九十里之界西頂

上
訪碑
錄

凡二十一字文與史記所載二世詔同而不完或傳其文刻於片木麻溫故學士得之於登州海上疑後

人所傳模也

集古
錄目

秦篆遺文纔二十一字云於久遠也如後嗣焉成功
盛德臣去疾御史大夫臣德其文與嶧山碑泰山刻
石二世詔語同而字畫皆異惟泰山篆為真李斯篆

爾此遺文者或云麻溫故學士於登州海上得片木
有此文豈杜甫所謂棗木傳刻肥失真者耶此論非
是蓋杜甫指嶧山碑非此文明矣之采在秦屬東萊

今屬登州

金石錄

後周秦始皇碑

大象二年立在不夜城即今文登縣

訪碑錄

田使君德政碑

文登石橋記

蓬萊閣靈應碑

三碑諸道石刻錄

萊州

春秋為萊國戰國屬齊秦屬齊郡二漢為東萊郡晉為東萊國宋為東萊郡後魏兼置光州北齊後周時因之隋開皇初郡廢五年改州曰萊州大業初州廢置東萊郡唐武德四年曰萊州天寶元年曰東萊郡今滕四掖縣萊陽膠水即墨

後魏鄭義碑二

魏史列傳與此碑皆云義萊陽開封人碑又云歸葬

於滎陽石門東十三里三皇山之陽而碑乃在今萊

州南山上磨崖刻之初余得義碑於_缺之南山其

末有云上碑在直南二十里天柱山之陽此下碑也

因遣人訪求在_缺縣界中遂模得之義之卒葬滎

陽其子道昭永平中為光州刺史為其父磨_缺刻

二碑焉按地里書後魏皇興四年分青州置光州領

東萊郡隋文帝時罷郡仍改光州為萊州云碑以永

平四年立

_{金石錄}

後魏鄭道昭登雲峯山詩

永平四年刻

金石錄

後魏天柱山東堪石室銘

鄭道昭撰永平四年

金石錄

後魏鄭道昭碑

諸道石刻錄

北齊雲峯小題記

鄭述祖撰河清二年五月

金石錄

北齊天柱山銘

在今萊州膠水縣初後魏永平中鄭道昭為郡守名
此山為天柱刻銘其上至北齊天統元年其子述祖
繼守此邦復刻銘焉碑以天統元年五月立

金石錄

唐膠水令徐公德政頌

唐王懷惠撰馮靈仙書開元十六年正月

金石錄

無愠

缺

萊州刺史姚訥為買石立碑無競東萊人墓在掖縣

界中

金石錄

維州

春秋戰國皆屬齊秦屬齊郡二漢為北海郡
晉為濟南國元魏復置北海郡北齊改郡曰
高海隋開皇初郡廢十六年分置雄州大業
初州廢屬北海郡唐初置維州尋廢屬青州
皇朝以青州北海縣置軍後陞為濰州政和
元年曰北海郡今縣三北海昌邑昌

漢逢童子碑并陰

刻畫完好碑云童子諱盛字伯彌薄令之立孫遂成

君之曾孫安平君之孫五官掾之長子也其後題光
和四年四月五日丁卯立舊在濰州昌邑縣近歲移
置郡中云

逢童碑陰題云右家門生右縣中士大夫凡十三人
有督郵璉敏賓璉后升司文叔盛姓字按璉與司文
姓氏盡皆不載今誌於此

金石錄

缺

人家門生四人後二人刁真解子逢信伯臺致和三

年徐修之遷於倅治之墨妙亭

復齋
碑錄

漢涼州刺史魏元丕碑

文字殘缺族系名氏皆不可考其粗可見者察孝廉
除郎中尚書侍郎右丞卒於光和四年而其額題涼

州刺史魏君碑

金石
錄

漢故涼州刺史魏君之碑篆額碑損其名有其字曰

元丕在朝為郎中尚書侍郎左右丞出刺涼州以靈

帝光和四年卒故吏雲中守門生曹

缺

漢博士趙傳逢君神道二

在北海縣東二十里漢博士逢汾墳前雙石柱篆書

訪碑
錄

漢逢府君墓石柱篆文云漢故博士趙傳逢府君神
道唐李利涉編古命氏北海逢氏有名絲字子繡者
為漢趙王傳其孫萌不仕王莽蓋前漢時人今逢君
北海人又為趙傳疑其是也而濰州圖經云北海縣

有逢汾墓云汾好學以德義聞徵為博士趙王傳卒
門人執衰經者數百葬於寒亭南四里今此篆文既
不載其名皆莫可考然圖經所載逢君事首尾甚詳
疑絲與汾兩人前後皆嘗為趙王傳未可知也故併

載之以俟知者

金石錄

漢外黃令徵試博士

缺

篆書漢故外黃令徵試博士

缺

復齋碑錄

漢故瑯琊相王君神道

篆文九字

復齋碑錄

漢逢君殘碑

諸道石刻錄

東魏逢元彥造像碑

北齊造石像碑

河清二年九月

金石錄

唐陽城郡太守趙公奭碑

唐馮用之撰韓擇木八分書衛包篆額天寶八載五

月五日建在北海縣

復齊碑錄

唐尊勝經石幢銘

唐崔恁撰王士則八分書天寶九載六月

金石錄

淄州

春秋戰國皆屬齊秦屬齊郡漢屬濟南樂安國後漢因之晉屬樂安國後魏置東清河郡北齊郡廢隋置淄州大業初州廢併入齊郡唐武德元年置淄州天寶元年曰淄州郡今縣四淄川長山鄒平高苑

魏孫炎碑

在長山縣西南三十里長白山東并碑陰門徒姓名

甘露五年立

訪碑錄

魏孫炎妻碑

佚

唐城門樓頌

滄海陸沈先生撰書人名缺開元十二年三月二十

七日建

唐立鄭司農碑

唐史承節撰雙思貞行書開元十三年正月立

金石錄

唐開元寺碑

唐涪州刺史李邕撰并書開元寺隋所建本名正等
唐初改曰大雲中宗初沙門玄沼重修又改曰神龍
寺玄宗親書額改為開元碑以開元二十八年七月

立

集古
錄目

碑初載於本寺後人移置郡廨敗屋下余為是州遷
於便坐用木為欄楯以護之云

金石
錄

唐諡文宣王進封充國公等詔

唐玄宗開元二十七年詔追謚孔子為文宣王使三公持節策命陵廟加人洒掃封後嗣為文宣公正廟像南面之位弟子東西列侍追封顏子為兗國公閔子等九人為侯曾子等六十七

缺

唐淄川郡述德記并詩序

記崔器撰序崔尚蔣渙王冕等撰詩李邕撰天寶十

載九月立

復齊碑錄

唐平盧節度薛平紀績述

唐栢元封換八分書無姓名篆額長慶三年三月

金石

錄

唐醴泉寺誌公碑

在鄒平縣長白山上

訪碑錄

唐高苑令素仁德政碑

碑缺不見立石年月在本縣

訪碑錄

唐裴行機德政碑

在高苑縣

諸道石刻錄

鄭司農碑

崔潛撰分書無年月

諸道石刻錄

唐餞小魏使君詩

唐劉思穆碑

顏神廟碑

三碑諸道石刻錄

周廣教院長老和尚碑

淮陽軍

春秋戰國屬宋魯秦屬薛郡漢屬東海郡後漢為下邳國晉宋因之梁為武州及下邳郡後魏為東徐州後周為邳州隋開皇初郡廢大業初州廢復屬下邳郡唐置邳州後州廢屬泗州又屬徐州皇朝置淮陽軍今縣二下邳宿遷

漢祝長嚴訢碑

政和中下邳民耕地得之碑云惟漢中興邠金休烈和平元年歲治東宮星屬角房月建朱鳥中呂之均

萬物慈射又云伊歎嚴君訢字少通兆自楚莊祖考
相承招命道術治嚴氏春秋馮氏章句又云幼為郡
掾史會稽諸暨尉烏程毗陵餘暨章安山陰長以病
去官後為丹陽陵陽丞守春穀長舉孝廉遷東

缺

侯相下邳祝長典牧十里所在若神其後有銘銘為

五言頗殘缺難讀云

金石錄

山陰長陵陽丞春穀長東年相祝長年六十九以威
宗和平元年卒其云歲治東宮星屬角房月建朱鳥

中呂之均者謂庚寅四月也

釋隸

缺苔滿字土埋龜風雨銷

缺

舊見無人知是蔡邕碑元祐中蘇邁書胡恭語謂此與劉寬碑同建詩為不誣予謂此固漢隸之上品似

非中郎筆法

隸續

漢太尉陳球前碑

漢故太尉陳公之碑篆額陳公名球字伯真下邳淮浦人三剖郡符五入卿寺再為三公靈帝光和二年

卒

釋

球有兩碑皆在下邳其一已殘缺此碑差完可考

金石

錄

漢太尉陳球碑陰

碑陰故吏故民凡四千人各有出錢之數陳公兩碑
書法皆不精此則遠過之此碑惟存穿之下橫兩列
餘皆剥落矣水經云下邳陳球墓前有三碑是弟子
管寧華歆等造此碑所見皆故吏故民而無管華姓

名宜與劉寬碑相類其一則弟子所立乎陳公兩碑
皆在淮陽莫適為先後趙氏但有一碑陰而水經謂
墓有三碑似亦指碑陰為一也此碑有兩裂又與前
一碑同故

缺

稍遷繁陽令太尉楊秉表球為零陵太守後累拜司
空光和元年遷太尉坐日蝕免復拜光祿大夫與司
徒劉邵等謀誅宦官曹節等不果下獄死其平時文

字磨滅不可讀惟云年六十有二

集古錄

漢故太尉陳公之碑篆額公既不得其死門人或畏
憚凶焰必不敢立石雙表也兩碑之前幾二百字可
讀其末則文字凋落如晨星相望豈其間蓋有憤懣
哀切之語後來益有所懼而剔之乎

隸釋

唐圮橋碑

無書撰人名氏

諸道石刻錄

城東南有小沂水水上有橋楚人謂橋曰圮張良遇

黃石公於下即此

興地記

唐圮上圖贊

唐李德裕撰沈傳師正書永貞元年

諸道石刻錄

唐圮上圖贊

唐李德裕撰齊推正書元和五年三月

金石錄

京東西路

南京

應天府高辛氏子閼伯所居商邱也周武王封微子啟是為宋國戰國時齊楚魏滅之三

分其地秦置碭郡漢為梁國東漢晉因之元
魏為梁郡後周置梁州隋開皇初郡廢十六
年置宋州大業初州廢又為梁郡唐復為宋
州天寶元年曰睢陽郡梁踰為宣武軍節度
後唐改歸德軍皇朝景德四年陞應天府大
中祥符七缺

秦詛楚文

余所藏凡有三本其一祀巫咸舊在鳳翔府解今歸
御府此本是也其一祀大沈久湫藏於南京蔡氏其
一祀亞駝藏於洛陽劉氏秦以前遺跡見於今者絕
少此文皆出於近世而刻畫完好文詞字札奇古可

喜元祐間張芸叟黃魯直皆以今文訓釋之然小有

異同

金石錄

治平中渭之耕者得之於朝那湫傍熙寧初蔡挺於
正為渭帥乃徙置郡解其辭正與巫咸文同而字體
亦相類惟大沈久湫神名與後稱堯劑楚師巫咸文
云克殄楚楚不同者二字蓋亦當時同刻之文也

石榮

林

碑藏故樞副敏肅蔡公屋壁實熙寧戊申後七十一

祀歲在敦牂故第燔毀武畧大夫汶陽李伯祥來宰
宋城雅好古文徙置郡廨屬予以歲月紀於碑陰首
夏戊午前府從事代郡畢造記蓋紹興八年也

本碑
跋尾

漢山陽太守祝睦碑

碑云君諱睦字元德其下遂闕滅不能成文惟其官
壽年月可見云賓於王庭除北海長史云云遷常山
相山陽太守年六十有八延熹七年八月丁巳卒睦
有二碑皆在今南京虞城縣此碑不見世次而後碑

則頗完

集古錄

兗州

饗慶府大都督府春秋戰國為魯邦二國之境秦置薛郡二漢屬魯國太山陽郡晉屬魯郡山陽兼置兗州宋屬魯郡太山高平魏后為晉郡北齊改為任城郡隋開皇三年郡廢大業二年改兗州為魯郡唐武德初克徐國朗復曰兗州天寶元年曰魯郡后陞太寧軍節度周防禦皇朝建隆元年復太寧軍大中祥符元年陞都督府今縣上

奉符 泗水 龔邱
仙源 萊蕪 鄒縣

秦泰山刻石并二世詔

李斯篆在奉符縣泰山頂上訪碑錄

小篆之法出於秦相李斯斯之相秦焚棄典籍遂欲滅先王之法而至已之所作則為萬世不可朽之計何其愚哉按史記秦始皇帝行幸天下凡六刻石及二世立又刻詔書於其傍今皆亡矣獨泰山頂上二世詔僅在所存僅十字耳今俗傳嶧山碑者史記不載又其字特差大不類泰山存者其本出於徐鉉又有別本出於夏竦家自唐封演已言嶧山碑非真而

杜甫直謂棗木傳刻云余友人江休復謫官於奉符
嘗自至泰山頂上視秦所刻石處云石頑不可鐫鑿
不知當時何以刻也其四面皆石無草木而野火不
及故能若此之久也然風雨所剝其存者纔數十字

而已

集古錄

大中祥符歲真宗皇帝東封此山兗州太守模本以
獻凡四十餘字其後宋莒公模刻於石歐陽公載於
集古錄者皆同蓋碑石為四面其三面稍磨滅故不

傳世所見者特二世詔書數十字而已大觀間汶陽
劉斯立親至泰山絕頂見碑四面有字乃模以歸文
雖殘缺皆首尾完具不可識者無幾於是秦篆字本
復傳世間矣碑既出斯立模其文刻石自為後序謂
之泰山秦篆譜云

金石錄

史記載秦始皇帝及二世皆行幸郡縣立石刻辭今
世傳泰山篆字可讀惟二世詔五十許字而始皇刻
辭謂已亡莫可復見宋丞相呂公鎮東平日遣工就

泰山摹倚墨本以慶歷戊子歲別刻新石親作後序
止有四十八字歐陽文忠公集古錄亦言及人江鄰
幾守官奉符親到碑下纔有此數十字而已余以大
觀二年春從二三鄉人登泰山宿絕頂首訪秦篆排
徊碑下其石埋植土中高不過四五尺形制似方而
非方四面廣狹皆不等因其自然不加磨礱所謂五
十許字者在南面稍平處人常所撫搨故士大夫多
得見之其三面猶殘缺蔽闇人不措意余審觀之隱

隱有若字痕刮摩垢蝕試令撫以紙墨漸若可辨自此益使加工撫之然終意其未也政和三年秋復宿嶽上親以殳推從事校之他本始為完善蓋四面周圍悉有刻字總二十二行行十二字字從西南起以北東南為次西面六行北面三行東面六行南面七行其末有制曰可三字復轉在西南稜上每行字數同而每面行數乃不同如此廣狹不等居然可見其十二行是始皇辭其十行是二世詞以史記證之文

意皆具計其缺處字數適同於是泰山之篆遂成完
篇宋歐陽二公初未嘗到惟憑工匠所說無缺惟人
多以二公為信故亦不復詳閱余既得墨本并得碑
之形象制度以歸舊觀聞之多來訪問倦於屢報乃
為此譜太凡篆字二百二十有二其可識者百四十
有六今亦作篆字書之其毀缺及漫滅不可見者七
十六以史記文足之註其下譜成猶壁間久幽沉晦
之迹今遂歷然秦至無義不足論然李斯小篆古今

所師經千三百有餘歲而復彰茲可尚也

河間劉斯立

秦嶧山碑

在鄒縣山南二十里亦名鄒山秦始皇東行郡縣上

鄒嶧山刻石頌秦德李斯篆書

橐宇記

始皇帝東巡羣臣頌德之辭至二世時丞相李斯始以刻石今嶧山實無此碑而人家多有傳者各有所自來昔徐鉉在江南以小篆馳名鄭文寶其門人也嘗受學於鉉亦見稱於一時此本文寶云是鉉所摹

文寶又言嘗親至嶧山訪秦碑莫獲遂以鉉所摹刻

石於長安世多傳之

集古
錄

唐封演聞見記載此碑云後魏大武帝登山使人排
倒之然而歷代模拓之以為楷則邑人疲於供命聚
薪其下因野火焚之由是殘缺不堪模寫然猶求者
不已有縣宰取舊文勒於石碑之上置之縣廨今人
間有嶧山碑者皆是新刻之本而杜甫直以為棗木
傳刻者豈又有別本歟按史記二十八年始皇東行

郡縣上鄒嶧山立石與魯諸儒生議刻石頌秦德而
其頌詩不載其他始皇登名山凡六刻石史記具載
其詞而獨遺此文何哉然其文詞簡古非秦人不能
為也秦時文字見於今者少此雖傳摹之餘然亦自

可貴

金石錄

漢居攝墳壇刻石二

其一云上谷府卿墳壇其一云祝其卿墳壇皆居攝
二年三月造上谷郡名祝其縣名不知所謂府卿與

縣卿為何官蓋自王莽居攝官名曰易故史家不能盡紀也其曰墳壇者古未有土木像故為壇以祀之兩漢時皆如此

金石錄

漢孔德讓碣

蓋其名已磨滅但云字德讓者宣尼公二十世孫都尉君之子也仕歷郡諸曹吏年二十永興二年七月遭疾不祿碑在孔子墓林中永興孝桓帝王號也都尉者宙也

集古錄

漢隸不著書撰人名氏孔君名缺德讓其字也孔子二十世孫仕至郡諸曹吏碑以永興中立在孔子墓

林中

集古
錄目

孔譙碣其名不甚可辨考孔氏譜得之所謂都尉君者太山都尉宙也孔融別傳云宙有七子融之次第六載於譜錄者惟有譙之名見史晨碑

漢孔君墓碣

在孔子墓林中其額題孔君之墓文已殘缺其前云

元年乙未而元年上闕二字按東漢書自建武以後
惟桓帝永壽元年歲次乙未其他有三乙未皆非元
年然則此碣所闕二字當為永壽也

金石錄

漢魯相韓勅造孔廟禮器碑

碑云永壽二年歲在涒灘霜月之靈皇極之日永壽
桓帝年號也按爾雅云歲在申曰涒灘桓帝永興三
年正月戊申大赦改元永壽明年歲次丙申日歲在
涒灘是矣霜月之靈皇極之日莫曉其義疑是九月

五曰

集古錄

漢隸不著書撰人名氏據碑孔子舅顏氏君魯親里并官聖妃后安樂里魯相河南京人韓勅字叔節復其里中繇役以尊孔子孔子廟舊歲車見毀於秦項之際勅修立宅廟造俎豆瑟鼓之屬吏作二輿時桓

帝永壽二年也

集古錄目

漢韓勅碑陰題名

自曲成侯王嵩二百河南成臯蘇漢明二百而下共

六十二人孔彪孔宙皆在列中

復齋碑錄

漢韓勅修孔廟後碑

碑云皇漢帝元永壽三年青龍建酉

缺

升布

天德帝拜大臣曾曾玄玄云云未有府君諱勅字叔節等題名十一人闕里祖庭記有永壽三年韓勅修

孔子墓碑在墓林中當是此碑

復齋碑錄

威宗永壽三年立其間云修飾舊宅改畫聖像立禮樂器車輿薦席墻屋壇井皆修廟事也其云謁廟拜

墓謂孔墓也

隸釋

漢韓勅孔廟後碑陰

碑陰凡五列所題士大夫可辨者七十人不名者八人漢人題名有稱徵試博士者此碑一人稱徵士蓋聘召而不行者自第二至第五列以其後四行直書冢下復民姓名皆羣小也故不當律令後一行云永

壽三年孔從事所立

隸續

漢韓勅孔廟後碑兩側題名

兩題名廣不及尺長如其碑蓋是刻於兩傍者趙氏
錄韓君後碑亦有陰豈即此耶或別有之也大中祥
符年遣翰林待詔尹熙古書七十二賢贊有鐫記在
其上又有知縣廟事孔子四十四代孫景同誌之文
知此在孔林而為韓碑題名較然矣石之一有唐人
李肱及慶歷中辛苦渝題識歲月皆刻於漢字之上
使古

缺

侵蝕吁可惜哉

續

漢泰山都尉孔宙碑

碑云君諱宙字季將孔子十九世孫也年六十一延熹六年正月乙未以疾卒於家官闕甚簡又或殘缺不完但見其舉孝廉為郎遷元城令遂為泰山都尉

爾

集古錄

隸書不著書撰人名氏孔君名宙字季將孔子十九世孫後漢桓帝時為泰山都尉以疾致仕碑以延熹

七年立

集古錄目

有漢泰山都尉孔君之碑篆額孔君名宙即融之父

也歷郎中都昌長元城令泰山都尉威宗延熹六年

正月卒碑以次年七月立

隸
釋

漢孔宙碑陰

碑殘缺其姓名邑里儘可見者纔六十二人共稱弟
子者十人門生者四十三人故吏者八人

漢吳雄孔子廟置卒史碑

隸書不著名氏其奏曰司徒雄司空戒言前魯相瑛
言孔子廟褒成侯四時祠已即去有禮器無常人掌

領乞置百石卒史出三家錢給饗禮元嘉三年奏制
曰可司徒司空下魯相承書從事選年四十通經藝
者永興元年相等言司徒司空府除文學掾魯孔
穌如牒并為贊刻於後吳雄河南人字李直趙戒成
都人

缺

姓已字少卿平原高唐人

集古
錄目

漢碑在者多磨滅此碑幸完好可讀錄之以見漢三

公奏事如此

集古
錄

孔廟置守廟百石卒史孔穌碑無額在仙源縣威宗

永興元年立碑載孔子十九世孫麟康請置百石卒
史一人掌廟中禮器魯相乙瑛書言之於朝司徒吳
雄司空趙戒奏於上詔魯相選年四十以上通一經
者為之時瑛已滿秩缺相平復以其事上於朝嘉
祐中都守張雅圭按圖經云鍾繇書繇以魏太和四
年卒去永興蓋七十八年圖經所云非也隸釋

缺

到官謁孔子冢其他文字雖完皆不可次第魯相晨
有兩碑皆在孔子廟中其一碑云臣蒙恩受任符守
得在奎婁周孔舊寓又云臣以建寧元年到官其一
碑云魯相河南史君諱晨字伯時從越騎校尉拜以
建寧元年四月十一日戊子到官然則斯碑所載名

晨者蓋魯相史晨也

金石錄

漢故司空孔公文碑隸額闕里祖庭記云孔林有司
空孔扶碑碑錄云司農孔峽碑在仙源縣墓前建寧

元年立農峽二字乃傳寫之訛其文上一半皆已淪
缺僅存其下九行多者十有四字碑云孔子十九世
孫則泰山都尉宙河東太守彪臨魯令僖之從昆弟
也順宗紀陽嘉二年六月太常魯國孔扶為司空注
云字仲淵次年十一月免詳此碑之辭乃司空當國
時辟史晨之父為士曹屬東閣祭酒後三十有三年
當靈帝建寧之元年晨自越騎校尉拜魯相以三月
丙申受命四月戊午到官既謁見聖冢遂為司空公

刻

缺

其文云五內慘惻霰然

缺

亡父見

缺

以示後昆蓋是懷

缺

非表阡納壙

之文也趙氏以為魯相謁孔子文當是不見其額之

故也

續

漢史晨祠孔廟奏銘

魯相上尚書章其畧云建寧二年三月癸卯朔七日
己酉魯相史晨長史臣謙頓首死罪上尚書臣晨頓
首頓首死罪臣以元年到官行秋饗飲酒泮宮

復禮孔子宅而無公出海脯之祠臣輒依社稷出王家穀春秋行禮建寧靈帝年號也於此見漢制天子之尊其辭補頓首死罪而不敢斥至尊因尚書以致達而已余家集錄漢碑頗多亦有奏章患其磨滅獨斯碑首尾字備可見當時之制也

集古錄

魯相史晨祠孔廟奏銘靈帝建寧二年立按永興元年孔鮒碑載吳雄奏用辟雍禮春秋饗孔廟出王家錢給大酒直距此終十有七年史晨復云到官秋饗

無公出酒脯之祠至於自用俸錢乞依社稷出王家穀以共禋祀此蓋有司崇奉不虔旋踵廢草也孔龢碑中吳雄奏章則云奏雒陽宮此亦奏牘乃云上尚書者郡國異於朝廷不敢直達帝所因尚書以聞也

樊穀

下民

缺

與此同

漢史晨饗孔廟後碑

碑云魯相河南史晨字伯時從越騎校尉拜以建寧

元年四月十一日戊子到官乃以今日拜孔子冢後

有天授二年馬元貞題

復齋
碑錄

前碑載奏請之章此碑叙饗禮之盛其補墻垣治瀆
井種梓守冢皆在饗廟之後字畫亦大小不等蓋史

君孔林中事不一書也

隸
釋

漢魯相謁孔廟殘碑

文已殘缺碑云帝命英授俾相於魯吉日令辰欽謁
下存者八行共百七字兗州石氏題為駐蹕亭前新

碑

復齋
碑錄

首尾上下皆碎裂餘石纔有數行前有帝命災授俾
相於魯吉日令辰欽謁十四字又云春秋蒸嘗幾以
獲福蓋是謁廟之文題為駐蹕亭前斷碑此亭蓋在
闕里趙氏著錄有魯相謁孔子碑而無其說疑即此

也

隸
釋

漢博陵太守孔彪碑

其名字磨滅不可見而世次官閥粗可考云孔子十

九代孫潁川君之元子也舉孝廉除郎中博昌長遭

太守君憂服竟拜尚書侍郎治書御史博陵太守遷

下邳相河東太守建寧四年

缺

月卒其餘文字歷歷

可讀以其斷絕處

缺

難續故

缺

錄然其終始

畧可見矣

缺

字皆亡為可惜也

歐陽公云孔君名字磨滅不可見今此碑雖殘缺而

名字尚可識云君諱彪字元上建寧四年七月卒

金石

錄

漢故博陵太守孔府君碑篆額孔君名彪歷郎中博

昌長京府丞

京上缺字

尚書侍郎治書御史博陵守下邳

相河東守以靈帝建寧四年卒

隸釋

漢孔彪碑陰

故吏司徒掾博陵安平崔烈字威考等十三人皆博

陵人

復齋碑錄

漢御史孔翊碑

熹平元年立在冢前孔子十九世孫州舉孝廉拜御

史遷中年洛陽令

闕里記

漢孔乘碑

君諱乘字敬山修嚴氏春秋在孔子墓林中

闕里記

漢孔林殘碑

篆書碑石中斷字畫磨滅不可讀

闕里記

漢御史大夫鄭宮碑

在龔丘縣墓下

訪碑錄

漢御史大夫卜式墓碑

在奉符縣北二十五里

訪碑錄

缺

中侯尚書尚書僕射常山

相山陽太守以威宗延熹七年卒

隸釋

漢山陽太守祝睦後碑

前碑不知所立人名字兩碑所載官閥壽考年月悉同而此碑有立碑人名氏及睦氏世次云故吏王堂等竊聞下有述上之功臣有叙君之德其餘文字亦

完可讀

集古錄

漢隸不著書撰人名氏睦故吏王堂等所立其所叙


述與前碑同

集古錄

漢故山陽太守祝君碑頌篆額與前碑皆在應食之
逆數而上十月無甲子趙德夫金石錄識於目錄之
下云建寧二年六月然此碑其稍漫不可識者則十
有四字其可識者三百十字而十月甲子又特全好
無昏舛可信而不疑況是年六月一日辛未亦無甲

子惟建寧三年十月乃正得甲子朔碑所謂其二年
者元年之後二年也

集古
後錄



寶刻叢編卷二